

Inuussutissarsiutinut pikkorissartitsisarnernut tapiissutit pillugit Namminersornerullutik Oqartussat nalunaarutaat nr. 21, 1. juli 2008-imeersoq

Inatsisarsut inatsisaanni nr. 2, 31. maj 1999-meersumi § 49 aamma § 52, imm. 2 naapertorlugit, Inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit Inatsisartut peqqussutaanni, kingullermik allanngortinneqartoq Inatsisartut peqqussutaat nr. 1, 16. maj 2008-imeersoq naapertorlugu, aalajangersarneqarpoq:

Atuuffia

§ 1. Matumani nalunaarut inuussutissarsiutinut pikkorissartitsisarnernut tapiissutit suliamik ilinniagaqarsimasunut ilinniagaqarsimanngitsunullu, ilanngullugit suliffissaaleqisut, sammitinneqartut inatsisitigut aalajangersarneqarput, taamaattorli tak. § 4, imm. 1 aamma 2.

Imm. 2. Matumani nalunaarut malillugu tapiissutit lærlinginut ilinniagaqartunulluunniit allanut tunniunneqarneq ajorput. Taamaattorli Piareersarfinni ilinniagaqarnermut atatillugu tapiissuteqartoqarsinnaavoq.

Pikkorissartitsisarnerit

§ 2. Inatsisartut aningaasaqarnermut inatsisaanni aningaasaliissutigineqartut malillugit tapiissutit tunniunneqartarput inuussutissarsiutinut pikkorissartitsisarnernut ilinniagaqaqqinnermilu pikkorissartitsisarnernut atatillugu angalanernut najugaqarnernullu aningaasartuutitut, taakku siunertarissammassuk pikkorissartut suliffeqarnermi pisariaqartitsinerit malillugit piginnaasaqarfigilikkaminnik piginnaanerulerlutillu ineriartortitsinissaat.

Imm. 2. Taamatuttaaq suliffissaaleqisunut ilinniagaqartunulluunniit Piareersarfinnut attuumassuteqartunut inuutissartissarsiutillu iluanni ingerlariaqqiffiusumik, annerpaamik, sivikinnerusumik ilinniagaqartunut pikkorissarneqarnerannut atatillugu angalanernut najugaqarnernullu aningaasartuutitut tapiissuteqartoqarsinnaavoq, taakku siunertarippassuk pikkorissartut inuttut ineriartornerannik siuarsaanissaq, taamatullu Inuussutissarsiutinut Ilinniartitaanerit Naalakkersuisoqarfiup nalilerpagu pikkorissartitsinerit taamaattuni peqataanissaq aalajangiisuussasoq suliatigut piginnaanngorsaqqinnermik ingerlatsiviusariaqartoq. Pikkorissartitsinerilli taamaattut pingaarnertut maleruagassarissavaat ingerlanneqartassamik Piareersarfinni ataasiakkaani inunnet pineqartunut iliuusissatut pinngitsoorani pilersaarussiaasartussat tunngavigalugit, takuuk suliffissanik innersuussisarneq il.il. pillugit Inatsisartut peqqussutaat, imaluunniit piginnaasaqarfigiligassanut malitseqarfiusunik pikkorissartitsisarnerit ilaannut ilaappata.

§ 3. Aningaasanut inatsimmi aningaasaliissutaasut iluanni tapiissutit inuussutissarsiutinut siuarsaaffiujumasunut piginnaasaqarfigiligassanik ineriartortitsinerit pikkorissartitsinerit atatillugu

angalanernut najugaqarnernullu aningaasartuutitut tunniunneqarsinnaapput. Taakku saniatigut pikkorissartitsinernut taamaattunut pikkorissarnermut akitsuutitut pikkorissarneriutinullu tamakkiisumik ilaannakortumilluunniit tapiissuteqartoqarsinnaavoq. Pikkorissartitsinerit ingerlanneqassapput Inuussutissarsiutinut Ilinniartitaanermut Naalakkersuisoqarfik, suliffeqarfiit aamma kommunit suleqatigalugit.

§ 4. Taamatuttaaq Inuussutissarsiutinut Ilinniartitaanermut Naalakkersuisoqarfik qullersanut inuussutissarsiutini ingerlariaqqiffiusumik, annerpaamik, sivikinnerusumik malitseqartinneqartunik tunngaviusumik pikkorissartitsisarnernut tapiissuteqarsinnaavoq.

Imm. 2. Imm. 1 aamma §§ 2-3 malillugit pikkorissartitsisarnernut taaneqartunut pikkorissaasunut ullormusianut, angalanernut najugaqarnernullu aningaasartuutitut tapiissuteqartoqarsinnaavoq. Pineqartunut qinnuteqaatit pikkorissartitsisussamut tunniunneqassapput.

§ 5. Inuussutissarsiutinut Ilinniartitaanermut Naalakkersuisoqarfik tapiissutinik tunniussisarnermut atatillugu Inuussutissarsiornermut Piginnaanngorsaanermullu Siunnersuisoqatigiinnit inassuteqaatinik ukiumoortumik pissarsisassaaq.

Tapiissutinik tunniussisarnermut najoqqutassat

§ 6. Tapiissuteqarfiginissamik qinnuteqaat sulisitsisumit, kommunalbestyrelsimit, tak. § 2, imm. 2, imaluunniit pikkorissaasussamit, tak. § 4, imm. 2, Inuussutissarsiutinut Ilinniartitaanermut Naalakkersuisoqarfimmut imaluunniit suliaqarfiusumut qitiusumik ilinniarfimmut inuussutissarsiutinulluunniit ilinniarfimmut tunniunneqareersimassaaq pikkorissartitsinissaq sioqqullugu ullut 14-it tikitsinnagit, tamatumani qinnuteqarnermut immersuiffiliaq atorlugu, imaqaassallunilu pikkorissartitsinissap siunertaanik, imarisassaanik, sivisussusissaanik, pikkorissarfiusussap sumiinnissaanik, peqataasussat amerlassusissaannik, angalanernut najugaqarnernullu aningaasartuutit pillugit aammalu allatigut tapiissuteqartoqarsimasinnaaneramik pikkorissartitsinissamut tapiissuteqartussap aningaasaliissuteqarfiusimasinnaasaanik nassuiaateqarfiusumik.

Imm. 2. Pikkorissartitsinernut ilinniagaqaqqinnermullu pikkorissartitsinernut atatillugu aatsaat tapiissuteqartoqarsinnaavoq pikkorissartitsinissaq pineqartoq sioqqullugu qinnuteqareernikkut tapiiffigineqarnissamik akuersissuteqartoqareersimappat. Tapiissutit sulisitsisumut imaluunniit pineqartumut aningaasartuutissanik isumaginnittumut tunniunneqassapput.

§ 7. Pikkorissartitsinernut ilinniagaqaqqinnermullu pikkorissartitsinernut sivikinnerpaamik ullunik sisamanik sivisussuteqartinneqartunut tapiissuteqartoqarsinnaavoq, pineqarsinnaallunili pikkorissartitsineq aaqqissuunneqarpat pikkorissartussat pikkorissarnissaq sioqqullugu pikkorissareernerulluunniit kingorna suliaasaqartinneqarpat.

Imm. 2. Imm. 1 naapertorlugu aalajangersagaqaraluartoq Inuussutissarsiutinut Ilinniartitaanermut Naalakkersuisoqarfik pikkorissartitsinissanut ullunit sisamanit sivikinnerusussanut atatillugu tapiissuteqarsinnaavoq pikkorissartitsinerit pineqartut suliaqarfimmut teknologiitigut imaluunniit ilisimatusarnikkut imaluunniit ilinniartitaanikkut malitseqarfiusutigut siunnerfeqartussaappata, ilanngullugit suliamik ilinniagaqarsimasunut ilinniagaqarsimanngitsunullu qullersatut tunngaviusumik

pikkorissartitsinerit.

§ 8. Pikkorissatitsinernut qitiusumik ilinniarfinnit imaluunniit inuussutissarsiutinut ilinniarfinnit neqeroorutigineqartunut ikinnerpaamillu arfinilinnik peqataaffigineqartussanut atatillugu taamaallaat tapiissuteqartoqarsinnaavoq, tamaattorli tak. imm. 2 aamma 3.

Imm. 2. Imm. 1 naapertorlugu aalajangersagaqaraluartoq pikkorissartitsinernut qitiusumik ilinniarfiit imaluunniit inuussutissartinut ilinniarfiit imaluunniit allat pikkorissartitsisinnaasut suleqatigalugit aaqqissuunneqartunut tapiissuteqartoqarsinnaavoq, assersuutigalugu ilinniartitaanernut malitseqartinneqartutut aaqqissuussanut Inuussutissarsiutinullu Ilinniartitaanermut Naalackersuisoqarfiup suliaqarfiusoq pillugu ataatsimiititaliamit inassuteqaatisiaa tunngavigalugu akuersereerneratigut.

Imm. 3. Imm. 1 naapertorlugu aalajangersagaqaraluartoq Inuussutissarsiutinut Ilinniartitaanermut Naalackersuisoqarfik pikkorissartitsinernut najukkani Piareersarfinnit allanilluunniit neqeroorutigineqartunut atatillugu tapiissuteqarsinnaavoq pikkorissartitsinerit pineqartut assigisinnaasaat Nunatsinni qitiusumik ilinniarfinnit imaluunniit inuussutissarsiutinut ilinniarfinnit neqeroorutigineqarsinnaanngippata. Inuussutissarsiutinut Ilinniartitaanermut Naalackersuisoqarfik pineqartunut akuersinissaminut atatillugu isumannaassavaa pikkorissartitsinerit suliatigut pissarsiviusinnaanissaat aammalu pisariaqanngitsumik aningaasartuuteqarfigineqarnissaa.

§ 9. Angalanernut aningaasartuutinut matussusiinissamut tapiissuteqarsinnaanissamut piunasaqaataavoq pikkorissarfiussamut utimullu angalanerit pikkorissarnissamut atatinneqarnissaat. Pikkorissaqataasoq piffissami allami angalappat pineqatumut angalanissaanut aningaasartuutinut matussusiinissamut tapiissuteqartoqarsinnaanngilaq.

Imm. 2. Angalanernut najugaqarnernullu aningaasartuutinik matussusiinissamut tapiissuteqarsinnaanermut piunasaqaataavoq angalanerit pikkorissarnerillu aaqqissuunneqarsimanissaat aningaasartuutigisassat sapinngisamik annikinnerpaatinniarlugit.

§ 10. Pikkorissartut 18-inik ukioqalereersimasuussapput, annerpaamillu, inuussutissarsiutinut ingerlariaqqiffiusumik sivikinnerusumik ilinniagaqarsimassallutik, Nunatsinni najugaqartuussallutik pikkorissartitsinissamullu pineqartumut peqataanissamut suliatigut tunngavissaritinneqartunik atasumik naammassinnissinnaassallutik.

§ 11. Pikkorissartitsinernut ilinniagaqaqqinnissamullu pikkorissartitsinernut pineqartunut angalanissanut najugaqarnissanullu aningaasartuutinik matussusiinissamik siunertaqartumik aningaasatigut allatigut tapiissuteqartoqarsinnaasimappat una malillugu tapiissutissarsisoqarsinnaanngilaq.

§ 12. Inuussutissarsiutinut Ilinniartitaanermut Naalackersuisoqarfik tapiissutinik aqutsinermut atugassanik immersuiffiliassanik nalunaarusiorfinnik suliaqassaaq.

Imm. 2. Tapiissutinik pissarsisup immersuiffiliaq nalunaarusiorfik immersoreerlugu Inuussutissarsiutinut Ilinniartitaanermut Naalackersuisoqarfimmut pikkorissartitsisimanerit pineqartut naammasseriiginnartut piaarnerpaamik nassiutissavaa.

§ 13. Taamaallaat tapiissuteqartoqartarpoq Inuussutissarsiutinut Ilinniartitaanermut Naalakkersuisoqarfiup akit aalajangersarsimasai naapertorlugit pikkorissarfiusussamut pikkorissarfiusumullu angalanernut najugaqarnermullu aningaasartuutissanut, taamaattorli tak. § 3 aamma § 4, imm. imm. 2.

Imm. 2. Pikkorissartitsiviusussami pikkorissartitsiviusumiit ullormit siullermiit ulloq kingulleq ilanngullugu pikkorissartitsiviusumut najugaqarnissamut nerisaqartinneqarnissamullu aningaasartuutininik matussusiinissamut, soorluttaaq pikkorissarfiusussamut tassanngaanniillu angalanermi akunninnermi najugaqarnermut nerisaqartinneqarnermullu aningaasartuutit matussuserneqassapput. Najugaqartinneqarnermut aningaasartuutininut pineqarput inissiaqartinneqarallarnermut sumiiffigisami naapertuuttunut aningaasartuutit atuuttut. Nerisaqartinneqarnermut aningaasartuutininut atasumik pineqarput Nunatsinni Nunatsinniillu suliamut atatillugu angalanermi ullormusiat unnuarsiornermullu tapisiat pillugit maleruagassat. Pikkorissartitsinermi nerisaqartinneqarneq najugaqarfissaqartinneqarnerlu ilaatinneqanngippata nerissarsiutissat unnuarsiornermilu tapisiat naalagaaffimmi, Namminersornerullutik Oqartussani kommuninilu atorfillit pillugit maleruagassat atuuttut naapertorlugit matussuserneqassapput, ilanngaatilugit ullaakkorsiutissanut atugassat, taakku akunnittarfimmiinnermi ilaatinneqareerpata, taamatullu akeqanngitsumik nerisaqartinneqarnissamut ajunngitsorsiasanit ilanngaatigineqartussatut.

Utertitsilluni akiliineq il.il.

§ 14. Inuussutissarsiutinut Ilinniartitaanermut Naalakkersuisoqarfik utertitsilluni akiiliisoqarnissaanik piumasqaateqarsinnaavoq, tamatumani:

1) Pikkorissartup pikkorissarnini taamaatiinnarpagu, akerlianik uppersarnerqarsinnaangippat taamaatitsiinnerneq pikkorissartup taassumaluunniit qaniginerpaasaani napparsimasoqarneranik pissuteqartoq.

2) Pikkorissartuq pikkorissartitsinermi aaqqissuussanut amigartumik peqataaniarsimappat uteqqiasumillu kingusinaarluni orniguttarsimappat; pikkorissartuq pikkorissaanermini iluamik malinnaasimangippat, taamatullu taamaattoqarneranut naammaginartumik tunngavissaqartoqanngippat.

Imm. 2. Pikkorissartup pikkorissarnini unitsiinnarpagu najugaqarnermi aningaasartuutininut matussusiinissamut tapiissuteqartoqarunnaassaaq piffiup pikkorissarfiusup sinnerani. Taamaakkaluortoq, Inuussutissarsiutinut Ilinniartitaanermut Naalakkersuisoqarfiup tamanna avaqqussinnaavaa taamaatitsiinnerneq pippat pikkorissartitsinermi qullersaasoq isumaqatigiissuteqarfigereerlugu, ilanngullugit pikkorissartumit imaluunniit taassuma qaniginerpaasanit napparsimaneq pillugu uppersaasikkat.

§ 15. Paasineqarpat tapiissutit siunertamut aningaasaliiffigisanit allanut atorneqartut, Inuussutissarsiutinut Ilinniartitaanermut Naalakkersuisoqarfiup tapiissutit pineqartut eqqunngitsumik tunngaveqartumik tapiissutisarineqarsimanerat tunngavigalugu pineqartuninik tamakkiisumik ilaannakortumilluunniit utertitsilluni akiilisoqarnissaanik piumasqaateqarsinnaavoq. Taamatuttaaq Inuussutissarsiutinut Ilinniartitaanermut Naalakkersuisoqarfik tapiissuteqarnissamik qinnuteqaatip suliarineqarneranut atatillugu kingusinnerusukkut suliaqarnermini pingaartinnerusinnaavaa tapiissutinik

pissarsisup utertitsilluni akiliinissaanik Naalakkersuisoqarfiup akilerneqarnissaannik piunasaqaateqarnissaq.

Naammagittaalliorneq

§ 16. Inuussutissarsiutinut Ilinniartitaanermut Naalakkersuisoqarfiup tapiissuteqaatit pillugit aalajangersagai, ilanngullugit tapiissutinik tunniussinissamik utertitsillunilu akiliinissat, pisortat aqutsisoqarnikkut oqartussaaffiannut allamut ingerlateqqinneqarsinnaanngillat.

Atuutilerpera

§ 17. Matumani nalunaarut atuutilerpoq ulloq 1. juli 2008 aallarnerfigalugu. Ilutigalugu, Inuutissarsiutitigut ilinniartitaanermi pikkorissartitsisarnerni tapiissutit pillugit Namminersornerullutik Oqartussat nalunaarutaat nr. 43, 24. oktober 1990-imeersoq atorunnaarpoq.

Namminersornerullutik Oqartussat, ulloq 1. juli 2008

Siverth K. Heilmann

/

Christel Lund Jæger-Hansen